



## 大陂塘

一窟大陂塘，分你个感想係麼个？係天个光影、雲个多情；係滿塘蓮花个嬌羞；係魚陣个自由拔尾……？係，所有你恤得著个，在該水竇光影中做下都顯現。莊下大漢个細人，對陂塘這名詞，總有講毋出个情感，該园在心肝肚深深所在，該無自覺个情份，在面對陂塘該下，斯清清楚楚知得咧。

寮過黃山，邊過胡雪巖个舊屋，一路寮到安徽个歙縣來，跨過省市，光景斯大不相同咧。打眼个烏、白色屋棟，在浸青个田坵、矮山坪之間，雅緻又古典，伙房屋雖然有大有細，毋過單一个烏白色目係厥等共同个特點。這種莊下个景致，分人聯想著收存在故宮肚，該目神睸人个古典美人圖，毋使多講，斯畀錫去咧。暗夜，戴莊肚个民宿，盲入莊，接眼斯看著將歸個藍天摘在窟肚个大陂塘。陂塘脣个大樹，因致地土、清清个陂塘水，逐頭都恁壯旺，年歲乜比陂塘脣个旅客、莊肚个老人還較老，綠葉遮天，斯堵好分行寮个人抵日頭。民宿个頭家係莊民个第四代，公姐兩個同老屋妝扮過後做民宿，整理過个間房狹狹，無高級飯店該降人个餐廳、毋使跋梯砌个電梯。細門牆、細禾埕，一頭有歲數梅樹、一蒲竹，企在入門个石砌面，禾埕脣拉拉雜雜種个花草草，欸！同吾姆个手路有相像哦！恤起該鼻膿像麵線樣斷毋斷个童年，試著親切又好笑。

星光下，大家打嘴鼓傍飯，天頂个月光笑微微，乜趕來湊鬧熱。第二日天甫甫光，鳥聲斯喊醒一覺日到天光个旅客咧。順緊湧(loˊ)湧滾个溝水，行到莊頭陂塘脣，打早，又係另外一個光景。倒影个青天白雲，係框肚个畫，還有玻璃个光彩。蓮花在清風中搖搖擺擺，當開个有當開个靚，含苞个有含苞个嬌尸。青荷荷个蓮葉，還承核碾舂斗个露水，魚陣在花莖之間搞园人尋，水面係一幅圖，水竇又乜係一幅有光影个圖。

陂塘脣，莊民跼緊洗衫、洗鑊，企緊洗面、鑷牙齒，也有學生一早就坐在門砌項陂塘脣畫圖，鵝、鴨像細船，不時沒水絡食，淺水所在，有角起來个菜廂，種个係好食个水生菜。漕漕(coˊ)滾个溝水，流對莊肚个家家屋屋門前、屋背過，彎彎幹幹過後，斯匯集在這窟大陂塘項，活生陂塘个所有生命。

在這位，看得著先民生活个大概，悠閒自在个生活方式，刻在石頭路面項，頓腳在高天天个大樹下。到今晡日，係正深深體會著，陂塘同僂人生活个密切關係。

作者：劉玉蕉

### ☆詞彙學習☆

【拔尾】badˊ mui+：尾巴左右擺動。

【打眼】daˊ ngienˊ：顯眼、醒目。

【睺人】laiˊ nginˊ：含羞地斜視他人。

【降人】hongˊ nginˊ：壯觀。

【拉拉雜雜】labˊ labˊ cabˊ cabˊ：雜七雜八。

【斷毋斷】donˊ mˊ ton+：止不住。

【搖搖擺擺】rheuˊ rheuˊ rhagˊ rhagˊ：搖擺。

【角起來】gogˊ kiˊ loiˊ：圍起來。